

四庫全書

史部

欽定四庫全書

欽定續通志卷五百二十一

忠義傳

元二

趙璉

琬

孫搗

石普

盛昭

楊乘

尼雅斯拉鼎

寶通  
錫卜

沙魯  
海瑠丹

伊嚕布哈

羅阿  
伯嘉努

台哈布哈

李輔德  
張君璧

徹長

巴延布哈德濟

大勝努 蔣廣

該里丹 陳受

蔡誠

樊執敬

全布延薩里

噶海齊

桑節

拜布哈

道通

余闕

李宗可紀守仁陳彬金承宗特穆爾布哈段桂芳和斯布哈錫里盧廷玉葛廷齡丘色許

元琰諤都瑪勒黃寅孫黃多倫岱楊恒余中陳巨濟

周鏜

謝一魯

聶炳

達爾

劉耕孫

燾孫 碩

俞述祖

桂鄂勒哲

金德

綽羅

馮三

博囉特穆爾

瑪哈實哩

彭庭堅

王巴延

相

托里布哈

達蘭布哈 哈奇爾 吳布延  
阿拉克布哈 迪延布哈

劉濬

伊蘇台

陳君用

布琳尼敦

上都

綽哈

黃紹  
黃雲

胡斗元

魏中立

于大本

趙璉字伯器宏偉之孫也至正元年登進士第歷官杭州路總管浙右病徭役民充坊里正者皆破家璉議以

屬縣坊正為雇役里正用田賦以均之民咸以為便至  
正中河南盜起湖廣荆襄皆陷兩淮騷動朝廷析河南  
地立淮南江北行省于揚州以璉參知政事分鎮真州  
璉方病即輿疾行會張士誠起海濱陷泰州興化高郵  
知府李齊往招之士誠偽請降且乞從征自効乃移璉  
鎮泰州璉趣士誠治戈船趨濠泗士誠疑憚不肯發既  
又覘知璉無備遂復反夜四鼓縱火登城璉力疾捫佩  
刀上馬與賊鬪市衢詰之曰汝輩罪在不赦今既宥爾



爾為使前往招之而用撫為輔行撫家居不知也中書  
加撫集賢待制給驛就其家強起之抵高郵士誠不遵  
詔撫等既入城反覆開諭士誠等佯竦聽已而拘之他  
室或日一饋食欲脇之降撫唯詬斥乃令其黨捶撫肆  
其陵辱撫不為動及士誠據平江撫與其部將張茂先  
謀持撫所授站馬劄子遣壯士赴鎮南王府約日進兵  
謀泄為所害後賊中見失節者輒自相唾曰此豈孫待  
制耶事聞追封曹南郡公諡忠烈

石普字元周徐州人至正五年進士授國史院編修官  
改經正監經歷淮東西盜起樞密院董鑰薦普材于朝  
會丞相托克托討徐州命從行徐平歷升樞密院都事  
從守淮安時張士誠據高郵普陳破賊之策曰高郵負  
重湖之險地皆沮洳騎兵卒莫能前願假步兵三萬保  
取之高郵既平則濠泗易破普請先驅為天下忠義倡  
托克托壯之命權山東義兵萬戶府事招民義萬人以  
行而汝中柏者方用事陰阻之減其軍半初令普便宜



行事及行又使聽淮南行省節制普行次范水砦日未  
夕普令軍中具食夜漏三刻下銜枚趨寶應即登城樹  
幟城上賊大驚潰乃水陸進兵乘勝拔十餘砦直抵高  
郵縱火燒關門賊懼將棄城走總兵者遣軍千騎突出  
普軍前欲收先入功賊以死扞城總兵軍即馳回普止  
之不可遂為賊所蹂踐率墜水中普軍亦亂賊乘之普  
血戰良久直入賊陣援兵忌普成功按不進從者僅三  
十人搏戰至日夕被創墮馬復步戰數合賊益至指曰

此必頭目須生致之普叱曰我即石都事何云頭目左  
脇為賊槍所中猶手握其槍斫賊賊衆攢槍來刺普與  
從者力盡俱死

盛昭字克明歸德人由儒學官累遷淮南行省照磨會  
詔使往高郵諭張士誠不得達遽還詭稱賊已迎降拜但  
乞名爵行省不虞其欺再遣昭入高郵授以萬戶告身

按元史本傳作授所與士誠  
官今據明史張士誠傳改

士誠拒不納拘諸舟中昭

語所從吏曰吾之至此有死而已既而官軍逼高郵士

誠授昭以兵使出拒昭叱曰吾奉命招諭汝汝拘留詔使罪不容誅反欲吾從汝為賊耶賊怒先剗其臂肉而後磔之

楊乘字文載濱州渤海人至正初為介休縣尹民飢散為盜乘立法招之使自新皆棄兵願為良民後累官江浙行省員外郎坐海寇掠漕舟免官寓居松江張士誠入平江其徒郭良弼董綬極稱乘才士誠遣張經招之乘曰良弼等皆名臣今已失節顧欲引我濟惡耶且讓

經平日讀書所學何事經俛首不能對乘與客痛飲竟

日不言客問盍行乎曰乘以一小吏致身顯官有死無

貳何行之有經促其行愈急乘乃慙衣冠自經死

按輟耕錄

云乘早為天官小史辟中書參議掾歷官數城介休二  
縣尹拜監察御史擢江浙行省員外郎是年杭州陷乘  
坐黜退居松江青龍鎮後御史言乘職在贊理不當罪  
宜復其官事遂白十六年張士誠陷平江遣所署官吳  
縣丞張經齎禮幣造請乘遣人告曰吾廢處田里久矣  
不足以辱使者吾當擇日受命請以幣置門外經如其  
言乘命子迥卓具牲醴告祖禰既竣事復命酒飲坐至  
夜分二子尚立侍命曰若且休吾將就寢語旦迥等怪  
寢門未啟發視之則已自經得手書大約言死生晝  
夜之理且以得全晚節為快所載與史傳互有異同

尼雅斯拉鼎字士瞻其父瑪哈穆特從征襄陽以勞擢  
瀋州達嚕噶齊因家大名尼雅斯拉鼎起身鄉貢進士  
淮東宣慰司辟為掾至正十年泰州賊起尼雅斯拉鼎  
建議築四城立外寨捷堤穿河募兵與賊抗行省檄其  
提戰艦巡江駐兵龍潭口賊不得渡屢有戰功留守蕪  
湖江口泰州李二作亂移捍高郵得勝湖賊船乘風來  
攻擊敗之其黨張士誠復殺李二為亂襲高郵屯兵東  
門尼雅斯拉鼎以舟師會真滌諸軍討之距三架鎮賊

衆猝至麾兵挫其鋒後賊鼓譟進更發火鏃射之死者  
蔽流而下賊繚船於背盡銳來攻諸官軍皆遁尼雅斯  
拉鼎以死自誓謂其三子寶通海瑠丹錫卜沙魯曰汝  
輩可脫走三子不肯去皆死之事聞追贈元帥府經歷  
伊嚕布哈字彥明蒙古蘇達蘇氏容貌魁偉未冠父圖  
卜特穆爾以千戶戍越因受業于韓性祭然成章就試  
江浙鄉闈中第一元統元年登進士第授台州路錄事  
司達嚕噶齊縣未有學乃建孔子廟又延儒士為師以

教後進丁外艱至正元年起為都水監經歷遞遷吏部

員外郎兩奉命糴粟江浙民不擾而事集既而丁母憂

中書起之不應會太師右丞相托克托南征按托克托傳至正十

四年張士誠據高郵久不下詔  
托克托總諸王諸省軍討之辟從軍事督饋餉饋餉

用舒升吏部郎中尋拜監察御史上疏言天子宜躬祀

南郊殷祭太室又言當簡老成重臣輔導太子帝皆嘉

納升吏部侍郎銓選公先適廷議欲於河間長蘆置局

造海船三百艘伊嚕布哈具言其非便忤議者意遷工

部侍郎復除保定路達魯噶齊保定歲輸糧於新鄉苦  
弗便伊嚕布哈請輸京倉以便之除吏部尚書保定父  
老百數詣闕乞留遂以尚書仍知郡事會賊北渡河日  
修城浚濠為戰守具尋兼統黑軍數千及團結西山八  
十二寨義軍勢大張賊再侵境皆不利遁去召還為詳  
定使保定民不忍其去繪像祀之去保定一月而城陷  
朝廷以其夙負民望令入城招諭抵城賊堅壁不出民  
多竊出謁拜者改大都路達魯噶齊轉吏部尚書會劇



賊程思忠據永平詔往招撫之衆難其行伊嚕布哈毅  
然曰臣死君命分也竟入城諭賊賊皆感泣拜降還遷  
翰林侍講學士俄復為大都路達嚕噶齊入見帝帝諭  
以母峻威毋弛法或挾權以干汝即以聞尋有權臣以  
免役事來謁伊嚕布哈斥曰聖訓在耳不敢違拜江南  
行御史臺中丞乃由海道趨紹興為政寬猛不頗既而  
除浙西廉訪使會張士誠據浙西僭王號度弗可與處  
乃令姪同壽具舟載妻子而匿身木櫃中蔽以藁結脫

走至慶元士誠部下知之追至曹娥江不及而返俄改  
山南道廉訪使浮海而往抵鐵山遇倭賊船乃率同舟  
人力戰拒之賊登舟攫伊嚕布哈令拜不屈遂遇害當  
遇害時麾下家奴諾海刺殺首賊次子樞密院判官羅阿  
姪伯嘉努扞敵亦死之同舟死事者八十餘人事聞謚

忠肅

按伊嚕布哈間闕王事卒以身殉元史舊源列傳今移入忠義

台哈布哈字兼善巴約特氏初名塔斯布哈文宗賜以  
今名世居白野山父塔布哈入直宿衛歷仕台州錄事

判官遂居於台家貧好讀書能記問集賢待制周仁榮  
養而教之年十七江浙鄉試第一對策大廷以進士及  
第授集賢修撰轉秘書監著作郎拜江南行臺監察御  
史時御史大夫托歡怙勢貪暴台哈布哈劾罷之文宗  
建奎章閣學士院擢為典籤拜中臺監察御史順帝即  
位加文宗后太皇太后之號按順帝本紀文宗崩雅克  
特穆爾請立太子為帝文  
宗后不從曰吾子尚幼明宗之長子在宜立  
乃迎順帝而立之故至是加后以尊號也大臣雅克  
特穆爾已延皆裂地封王台哈布哈率同列上章言嬖

母不宜加徽稱相臣不當受王爵太后怒欲殺言者台  
哈布哈語衆曰此事自我發之甘受誅戮決不累諸公  
也已而太后怒解出簽河南廉訪司事俄移淮西遞轉  
江浙行省左右司郎中浙西大水會台哈布哈入朝言  
於中書免其租擢秘書監改禮部侍郎至正元年除紹  
興路總管革吏弊除沒官牛租令民自實田以均賦役  
行鄉飲酒禮教民興讓越俗大化召入史館與修遼金  
宋三史書成授秘書卿升禮部尚書兼會同館事八年

台州黃巖民方國珍為亂詔江浙叅政多爾濟巴勒總  
舟師捕之追至福州五虎門官軍自潰多爾濟巴勒遂  
被執國珍迫其上招降之狀朝廷從之國珍兄弟皆授  
官國珍不肯赴勢益暴橫九年詔台哈布哈察實以聞  
既得其狀遂上招捕之策不聽尋除江東廉訪使改翰  
林侍讀學士知制誥同修國史已而出為都水庸田使  
十年國珍復入海燒掠沿海州郡十一年詔博囉特穆  
爾為江浙行省左丞總兵至慶元以台哈布哈知賊情

遷浙東道宣慰使都元帥分兵于温州使夾攻之未幾

國珍寇溫

按方國珍寇溫續通鑑綱目載于至正十年十二月此叙于十一年之下互異

台哈

布哈縱火筏焚之一夕遁去既而博囉特穆爾率兵進討至大間洋國珍夜縱火鼓譟官軍潰博囉特穆爾被執朝廷復遣大司農達實特穆爾等至黃巖招之國珍兄弟皆登岸羅拜退止民間小樓台哈布哈欲命壯士襲殺之達實特穆爾不可乃止檄台哈布哈親至海濱散其徒衆拘其海舟兵器國珍兄弟復授官有差既而

遷台哈布哈台州路達嚕噶齊十二年朝廷征徐州命江浙省臣募舟師守大江國珍懷疑復入海叛台哈布哈發兵扼澄江遣義士王大用約使來歸國珍益疑拘大用不遣以小舸二百犯馬鞍諸山台哈布哈誓衆前往擊之時國珍戚黨陳仲達往來計議陳其可降狀台哈布哈率部衆張受降旗乘潮而前船觸沙不能行垂與國珍遇呼仲達申前議仲達目動氣索台哈布哈覺其心異手斬之即前搏賊船射死五人賊躍入船復砍

死二人賊羣至攢槊刺之中頸死猶植立不仆投屍海  
中時十二年也僮名抱琴及臨海尉李輔德千戶徹辰  
義士張君璧皆死之台哈布哈既沒除江浙行省叅知  
政事不及聞命後三年追封魏國公謚忠介立廟台州  
賜額崇節台哈布哈尚氣節不隨俗浮沈雖為時相擯  
斥人莫不趨之善篆隸嘗重類復古編十卷攷正謬字  
於經史多有據云

按台哈布哈始于言事終于死節不  
愧純臣元史舊係列傳今移入忠義

巴延布哈德濟字蒼崖輝和爾氏駙馬都尉高昌王舒



蘇德濟之孫多喇德濟子也

高昌王世勳碑作  
特穆爾布哈子

個儻好

學曉音律初用父廕同知信州路事歷遷浙東都元帥  
守衢州尋擢江東道廉訪副使至正十八年陳友諒遣  
賊黨王奉國等寇信州明年正月巴延布哈德濟自衢  
引兵援信破走之時鎮南王子大勝努屯兵城中聞援  
師至開門出迎羅拜馬前巴延布哈德濟登城四顧誓  
以破賊自許乃大饗士卒分命大都閭高義為左右翼  
已為中軍奮擊入賊營斬首數千級後數日友諒弟友

德列營城東攻益急遣使來說降高義潛與賊通往見奉國明日奉國令義以計來誘巴延布哈德濟坐城上見義單騎至謂曰汝欲作說客耶我頭可斷足不可移乃數其罪斬之由是日夜鏖戰糧竭矢盡而氣不少衰夏四月有大呼城下者曰有詔參謀該里丹臨城問之曰何來曰江西來該里丹曰如此乃賊耳吾元朝臣子可受爾偽詔乎呼者曰我主聞信州久不下知爾忠義故來詔爾徒守空城何為該里丹曰汝聞張睢陽事乎

偽使者不答而去巴延布哈德濟笑曰賊欲我降耶城存與存城亡與亡吾計之熟矣時軍民唯食草苗茶紙既盡括靴底煮食之又盡掘鼠羅雀及殺老弱以食五月大破賊兵六月奉國親來攻城晝夜不息者踰旬賊穴地百餘所魚貫梯城而上士卒力疲不能戰城遂陷大勝努該里丹皆死之巴延布哈德濟力戰不勝遂自刎其部將蔡誠盡殺妻子與蔣廣奮力巷戰誠遇害廣為奉國所執愛其勇使之降廣曰我寧為忠死不為降

生賊怒磔廣于竿大罵而絕有陳受者信州小民也巴  
延布哈德濟知受有膂力募為義兵戰敗被獲痛罵不  
屈賊焚殺之先是巴延布哈德濟之援信州也嘗南望  
泣曰我為天子司憲視彼城之危急忍坐視乎吾知上  
報天子下拯生民餘皆無可恤所念者太夫人耳即入  
拜其母鮮于氏曰兜今不得事母矣母曰爾為忠臣吾  
即死復何憾鮮于氏太常典簿樞之女也巴延布哈德  
濟因命子額森布哈奉其母間道入閩中及死謚桓敏

樊執敬字時中濟寧鄆城人性警敏好學由國子生擢授經郎嘗見帝師不拜曰吾孔氏之徒知尊孔氏而已何拜異教為歷官江浙行省叅政至正十二年督海運于平江卜日將發官大宴犒于海口俄有客船自外至驗其券信令入而不虞其為寇也既入港即縱火鼓譟時變起倉猝軍民擾亂賊竟焚舟劫糧以去執敬自咎失防心鬱鬱不解及還省會徐壽輝遣偽將項普畧自饒信入昱嶺闕犯杭州時執敬已被命討賊海上至是

事急不得去掾史蘇友龍進曰城內空虛無備奈何執  
敬曰吾淬礪戈矛當殲賊以報國不濟則以死繼之何  
畏哉俄報賊奄至遽上馬帥衆出中塗與賊遇射死數  
人賊來轉盛且縱火衆皆潰賊知其無援呼執敬降執  
敬叱曰逆賊守關吏不謹汝得至此恨不碎汝萬段何  
謂降耶乃奮刀斫賊因中槍而墮從僕田額森馳救亦  
中槍死事聞追封魯國公

全布延薩里字子仁高昌人初為中書省檢校時太師

汪嘉努擅權臺諫無敢言者布延薩里獨於衆中屢數其過諤諤無懼色及拜監察御史即首劾汪嘉努十罪乃見黜然氣節益振不以摧折稍阻厯授贛州路達魯噶齊發姦摘伏一郡肅然至正十一年潁州盜起即修築城壘發公帑募勇士得三千人練習皆可用屬邑有被陷者遣兵克復之境內悉安十六年以功拜江西叅政分省贛州時江西下流諸郡皆為陳友諒所據乃與總管噶海齊戮力同守友諒遣其將辛文才率兵圍贛

使人誘降布延薩里斬其使日擐甲登城拒戰凡四閱  
月兵少食盡義兵萬戶瑪哈瑪迪沙欲舉城降布延薩  
里不從遂自剄事聞贈諡做哀噶海齊守贛尤久城陷  
賊將脅之降噶海齊曰與汝戰者我也爾賊毋殺贛民  
當速殺我遂見殺

桑節字吉甫河西人曾祖多爾濟祖綽斯戩多爾濟父  
綽斯戩世事太祖憲宗世祖為克埒穆爾齊桑節少給  
事仁宗潛邸以精敏稱至治朝累遷為宣政院使出為



江南行臺御史大夫時承平日久內外方以觀望為政  
桑節獨持風裁御史行部必敕厲而遣之湖東簽事三  
寶珠性廉介所至搏貪猾無所貸御史有以私請者拒  
不納則誣以事劾之章至桑節怒曰若人之廉孰不知  
之乃為是言耶即奏杖御史而白其誣執政者惡之移

湖廣行省平章政事湖廣地連江北威順王

按威順王  
名庫春布

哈時統軍鎮湖廣  
詳見順帝本紀

歲嘗出獵民病之又起廣樂園多萃

名倡巨賈以網利有司莫敢忤桑節至謁王面責之王

急握手謝為悉罷其所為有胡僧小住持者服三品命  
恃寵橫甚數以事凌轢官府桑節命掩捕之得妻妾女

樂婦女十有八人獄具籍之由是貧弱稱快至正十一

年汝頰妖賊起會僚屬議或言鄭萬戶老將也

鄭萬戶  
史傳闕

名宜起用之桑節乃募土兵完城池修器械嚴巡警悉

以其事屬鄭賊偽遣其黨二千來降桑節與鄭謀審得  
其詐殲之械其渠魁數十人以俟命適有旨召為大司  
農同僚受賂賂且嫉其功乃誣鄭罪釋其所械者明日

賊大至內外響應武昌遂陷桑節入見具陳賊本末帝大喜命賜食時宰不悅奏為江西行省平章政事桑節至江東詔令守江州時江州已陷賊據池陽太平官軍止三百人賊號百萬衆皆欲走桑節曰畏賊而逃非勇也坐而待攻非智也乃貸富人錢募得三千人具舟楫直趨銅陵克之又破賊于白馬灣分兵躡之抵白涓賊窮急回拒官軍乘勝奮擊賊盡殪擒其渠魁周驢軍聲大振遂復池州

按布延特穆爾博至正十二年桑節與額森特穆爾曼濟哈雅布延特穆爾會

兵敗賊於丁家洲遂復銅陵及池州此傳專  
言桑節以三千人克捷而不及他將互異 乃命諸將

分道討賊復石埭諸縣進據清水灣伺者告賊艦至自  
上流順風舉帆衆且數十倍諸將失色桑節命伏兵橫  
港中偃以待風怒水駛賊奄忽而過乃舉旗張帆鼓譟  
薄之賊又大敗時賊久圍安慶捷聞遽燒營走進復湖  
口縣克江州留兵守命王惟恭柵小孤山而桑節自據  
番陽口綴江湖要衝以圖恢復時湖廣已陷江西被圍  
淮浙亦多故無繼援之者日久糧益乏士卒咸困或言

東南完實蓋因糧以圖再舉桑節曰吾受命守江西必死於此衆莫敢復言有頃賊乘大船四集元軍力戰衆死且盡桑節之從子拜布哈死之桑節堅坐不動賊發矢射乃昏仆賊素聞其名不忍害昇置密室中至旦乃蘇賊羅拜爭饋以食桑節斥之遂不復食凡七日乃自力而起北面再拜曰臣力竭矣遂絕桑節為人公廉明決及在軍中能與將士同甘苦以忠義激人心故能以少擊衆得人死力云

按桑節道通余闕三人皆死于陳友諒忠節表著元史舊係列

傳今並移  
入忠義

道通高昌人自號石巖性深沈寡言以世胄入官授直  
省舍人歷官清顯素負能名調信州路總管移平江皆  
以善政稱至正元年遷大都路達魯噶齊遞遷為江浙  
行省平章政事十一年仍以平章政事行省江西是年  
賊起蘄黃平章政事塔奇勒布哈將兵捍江州既而土  
寇蠡起道通素不知兵倉皇無所措用左右司郎中布延  
布哈薦以致仕左丞章巴延署本省左丞事專任調遣

軍旅巴延欣然至與布延布哈設禦敵計甚悉明年湖廣陷塔奇勒布哈由江州遁還布延布哈將兵往江州至石頭渡遇賊戰敗道通大恐即懷印遁布延布哈還與巴延定為守城之計後數日道通自南昌民家來歸遂議分門各守以備敵既而賊來圍城城中晝夜堅守而道通素恤民能任人故衆樂為之用圍兩月民無離志道通密召死士數千人面塗以青額抹黃布衣黃衣為前鋒又選精銳數千為中軍命萬戶章托音布爾噶

岱領之夜半開門伏兵柵下黎明鉦鼓大震因奮擊賊賊驚為神敗走乘勝擣其營復分兵掃其餘黨時章巴延布延布哈之功居多巴延尋以疾卒朝廷以道通捍城有功加大司徒開府復命額琳沁巴勒為江西行省左丞相以和尼齊為左丞同將兵來江西未幾額琳沁巴勒卒道通屬和尼齊平富瑞二州分鎮其地適歲大旱公私匱乏道通乃移咨江浙行省借米數十萬石鹽數十萬引分給軍民由是按堵如故而賊亦不敢犯其



境十八年陳友諒復攻江西城時和尼齊已升平章政事加營國公行便宜事任專兵柄而素與道通不相能且貪忍不得將士心見城且陷遂夜遁道通亦棄城退保撫州路欲集諸縣義兵以圖克復而勢已不可為因嘆曰我為元朝大臣城陷不守尚何面目見人適賊追者至道通欲迎敵渡未登岸為賊所害事聞賜諡忠

烈

余闕字廷心一字天心唐古氏世家河西武威父實喇

藏布官廬州遂為廬州人少喪父授徒以養母元統元  
年賜進士及第授同知泗州事俄召入應奉翰林文字  
轉中書刑部主事以不阿權貴棄官歸尋以修遼金宋  
三史復召入翰林為修撰拜監察御史改中書禮部員  
外郎出為湖廣行省左右司郎中會莫徭蠻反右丞實  
保當帥師堅不往闕促之辭以芻餉不足闕曰此不難  
致下令趨之三日皆集實保乃行復以集賢經歷召入  
遷翰林待制出簽浙東道廉訪司事丁母憂歸廬州盜

起河南至正十三年起闕副使簽淮西都元帥府事分  
兵守安慶抵官甫十日寇至拒却之乃與諸將議以瀋  
山八社土壤沃饒悉為屯田明年大饑乃捐俸為粥以  
食民失業者咸安集之升同知副元帥又明年大旱為  
文祈灑山神三日雨歲以不饑盜方據石蕩湖出兵平  
之十五年秋稼登得糧三萬斛闕乃浚隍增陴環以深  
塹植木為柵城上起飛樓表裏完固俄升都元帥時羣  
盜環布四外闕居其中左提右挈屹為江淮保障論功

拜江淮行省參知政事仍守安慶通道于江右商旅四  
集池州趙普勝帥衆攻城連戰三日敗去未幾又至相  
拒二旬始退十七年趙普勝同青軍兩道來攻拒戰一  
月餘竟敗走拜淮南行省右丞沔陽陳友諒自上游直  
擣小孤山義兵元帥胡巴延與戰不勝遂薄城下闕遣  
兵扼於觀音橋俄饒州祝寇攻西門闕戰却之  
原作斬却是時祝寇僅斂兵稍退  
固未嘗獲而誅之不得云斬今改既而賊乘東門紅  
旗登城闕簡死士力擊賊復敗去俄并軍攻東西二門

又却之賊恚甚攻益急普勝軍東門友諒軍西門祝寇  
軍南門羣盜四面蟻集外無一甲之援闕徒步提戈為  
士卒先士卒哭止之揮戈愈力斬首無算闕亦被十餘  
創日中城陷闕引刀自剄墮清水塘中闕妻伊伯氏及

子德生女福童皆赴井死

按續通鑑綱目作闕妻蔣氏  
妾伊伯耶律氏子德臣女安

安甥福童皆赴井死  
視此較詳且有異同

時守臣韓建一家被害建方臥疾

罵賊不屈賊執之以去不知所終城中民相率登城樓

自焚死者以千計其知名者萬戶李宗可紀守仁陳彬

金承宗元帥府都事特穆爾布哈萬戶府經歷段桂芳  
千戶和斯布哈錫里盧廷玉葛延齡丘丞許元琰奏差  
諤都瑪勒百戶黃寅孫安慶推官黃多倫岱經歷楊恒  
知事余中懷寧令陳巨濟等凡十八人計城陷之日則  
至正十八年正月也闕號令嚴信與下同甘苦然稍有  
違令即斬以徇一時將士樂為致命軍旅之暇即注周  
易帥諸生謁郡學會講立軍士門外以聽使知尊君親  
上之義有古良將風烈追封幽國公諡忠宣闕留意經

術五經皆有傳註工詩文及篆隸既死賊義之求屍塘中具棺斂葬於西門外

周鏜字以聲瀏陽州人篤學通春秋登泰定四年進士第官大治縣尹鏜狀若尪懦而毅然有威不可犯抑豪強惠窮民治行為諸縣最會修功臣列傳擢翰林國史院編修官出為四川行省儒學提舉便道還家至正十一年紅巾盜起湖南北郡縣皆陷瀏陽無城守盜至民皆驚竄鏜告其兄弟使遠引自謂我受國恩脫不幸必

死毋相累也賊至得鏜欲推為主鏜厲聲大罵賊知不可屈乃殺之同時有謝一魯字至道亦瀏陽人至元乙亥鄉貢進士嘗為石林書院山長賊陷潭州一魯奉親匿岩谷中官兵復郡邑亡者稍歸乃還理故業俄而賊復至生縛之一魯罵賊甚厲舉家咸遇害

聶炳字韞夫江夏人元統元年進士授同知平昌州事至正十二年遷知荊門州纔半歲紅巾賊至荊門不守炳出募土兵得衆七萬復其城又與四川行省平章耀



珠復江陵縣既而賊勢復振偽將俞君正合兵來攻炳  
率孤軍晝夜血戰援絕城陷為賊所執極口罵不絕賊  
以刀抉其齒盡乃支解之時有明安達爾字士元唐古  
氏炳同年進士也為潛江縣達嚕噶齊賊至率勇敢出  
擊擒其偽將劉萬戶進營蘆洲比城陷關死舉家殲焉  
劉耕孫字存吾茶陵州人至順元年進士授臨武縣尹  
縣近蠻徭耕孫至為建學校求民間俊秀教之設俎豆  
習禮讓三年文化大興歷建德徽州瑞州三路推官所

至詳讞疑獄俱有政績至正十二年蕪黃賊破湖南耕  
孫傾家貲募義丁以援鄉里賊至輒却故茶陵久不失  
守十五年轉寧國路推官歲饑勸富民出粟賑之活者  
萬計會長槍軍索諾木巴勒等攻寧國耕孫分守城西  
南日署府事夜率兵乘城固守賊引衆緣堞而上城陷  
力戰遇害弟燾孫以國學下第授常寧州學正湖南陷  
常寧長吏棄城走民奉印請燾孫為城守城賴以完者  
一年外援既絕死之長子碩為江夏魯湖大使起義兵

援荅陵亦死之

按同時死節者尚有劉興孫係燾孫弟官南豐州同知值寇亂伏節死于臺城

詳見  
楚紀

俞述祖字紹芳慶元象山人由翰林書寫授國史院編修出為沔陽府推官至正十二年蕪黃賊丁普郎陷武昌進攻沔述祖領民兵守綠水洪并力捍禦兵力不支城陷為賊所執械至徐壽輝所誘之使降述祖罵不輟壽輝怒支解之有子方五歲亦死追贈象山縣男

桂鄂勒哲永嘉人

名賢錄及温州志俱作季姓字坦之

嘗為平江路管軍

鎮撫為仇家所訴免官會賊攻昱嶺關行省遂假前官  
令從征鄂勒哲勇于討賊凡再戰關下皆勝尋又與賊  
鬪為所執其妻弟金德亦被擒皆反縛于樹臨以白刃  
脅之降金德意未決鄂勒哲呼曰大丈夫死即死耳不  
可為不義德曰此言是因大罵賊怒剖二人腹而死

綽羅字時中蒙古氏登元統元年進士第累官京畿漕  
運副使出知安陸府至正十二年徐壽輝偽將魯法興  
犯安陸時綽羅募兵得數百人帥以拒賊敗其前隊乘

勝追之賊自他門入亟還兵城中火起軍民潰亂計不可遏乃歸服朝服坐公堂賊至排之下使拜不屈且怒罵賊不忍害拘之明日又逼其從亂綽羅叱曰吾守土臣寧從汝賊乎賊怒以刀斫其左脇斷而死復取布囊盛其屍昇置其家妻侯氏出大哭且列酒肉滿前渴者令飲饑者令食以紿賊使不防已至夜自經事聞贈綽羅河南行省叅政侯氏寧夏郡夫人表其門曰雙節有馮三者湖廣省役卒也素不知書省署為寇陷皂隸輩

悉起剽殺為盜拉三同行辭曰賊名惡我等豈可為衆強之終弗聽怒將殺之三遂唾罵賊乃縛諸木鼻以行而剗其肉三益罵不止抵江上斷其喉委去其妻隨三號泣俯拾剗肉納布裙中伺賊遠收其血骸脫衣裹之投江而死

博囉特穆爾字國賓高昌人由宿衛補官累選為襄陽路達魯噶齊至正十一年汝頴盜起鄖縣人田端子等亦聚衆殺官吏博囉特穆爾將民兵捕斬之未幾行省

廉訪司同檄討賊賊始退而穀城光化以急告即率兵趨穀城而分遣樊城主簿托音等趨光化屢遣使求糧於襄陽不應明年襄陽失守博囉領義兵二百人且戰且引至監利縣遇沔陽府達魯噶齊耀珠同知沙善安陸府同知揚珠布哈荆襄提舉僧格實哩之師時濱江有船千餘乃糾合諸義兵丁壯水工五千餘人乃趣還襄陽賊方駐楊湖港乘其不虞擊之獲船二十七艘進次潛江又斬賊數百級獲三十餘船梟賊將劉萬戶許

堂主等是日甫止兵未食而賊大至與戰抵暮被重創  
麾兒子瑪哈實哩使去曰吾以死報國汝無留此瑪哈  
實哩泣曰願以死從既而博囉被執罵賊遇害瑪哈實  
哩帥家奴求其屍復與賊戰没于陣舉家死者凡二十  
六人

彭庭堅字允誠温州瑞安人至正四年進士授同知沂  
州事毀牛皇神祠驅鄰郡上馬賊免民橫急徵斂州人  
甚德之俄以平反獄囚忤上官意遂解歸十一年詔選



守令起崇安縣尹屢平閩境賊遷同知建寧路事江西  
寇熾庭堅率民兵克復建陽又進兵平浦城十二年攝  
簽都元帥府事與邵武路總管吳阿勒坦布哈夾攻邵  
武庭堅設雲梯火礮晝夜攻擊寇遁追斬渠兇董元帥  
鐵和尚童昌邵武悉平升同知福建道宣慰司副都元  
帥鎮邵武寇陷建寧庭堅統民兵降其將復之十四年  
盜侵政和松溪南臺中丞吳鐸督軍建寧檄庭堅至時  
鎮撫萬戶岳煥隸麾下煥素悍縱卒為暴庭堅欲繩以

法煥懼使部卒乘其不備詐為賊兵突入鋒旣交衆皆走散庭堅獨留不去遂遇害南臺御史余觀行部至獲賊斬之為上其事追封忠愍侯

王巴延

閩志作王簡

字伯敬濱州霑化人由湖廣省宣使歷

永州祁陽湖州烏程縣尹至正九年遷知福寧州紅巾賊自邵武間道徧福寧巴延與監州額森都呼募壯兵五萬分扼險阻賊至楊梅嶺立柵巴延與子相馳破之賊帥王善俄擁衆直壓州西門胥隸皆解散麾下唯白

挺市免數百人巴延射賊被執善謂曰聞公有惠政此州  
那可無尹公為我尹可乎巴延呵之曰我天子命官不  
幸失守義當死肯從汝乎善怒叱左右搯以跪弗屈遂  
毆之巴延嚼舌以血噴善曰殺即殺何以毆為大丞相  
親討叛逆百萬之師雷擊電掃汝輩小醜將無遺類顧  
敢爾耶賊又執額森都呼至善責其拒鬪噤不能對巴  
延復唾善曰我殺賊何言拒耶我死當為神以殺汝言  
訖挺頸受刃頸斷涌白液如乳暴屍數日色不變賊并

殺額森都呼欲釋相官之相詈曰吾與汝不共戴天恨  
不寸斬汝寧受汝官耶賊殺之相妻潘氏挈二女為賊  
所獲亦罵賊母子同死巴延既死賊時睹其引兵出入  
有州僧林德誠起兵討賊望空噉曰王州尹宜率陰兵  
助我時賊方祠神覩紅衣軍來以為偽帥康將軍亟往  
迎之則四面皆青衣官軍賊大敗斬其酋江二蠻福寧

遂平事聞追封太原郡侯

按名賢錄云長子楨往收得  
父母屍藁葬烏程朝命以楨

襲父爵除紹興總管張士誠陷城楨亦不屈死又閩志  
云陳陽盈字子謙為泉州府稅課使賊攻福寧州知州

王簡撤陽盈率民兵拒賊賊執之  
脅使降陽盈抗義嘗賊同見殺

托里布哈字端甫蒙古人由宿衛累官遼陽行省平章  
陳友諒陷江西詔移江西行省遂泛海南下趨廣東駐  
師揭陽降土寇金元佑克復循梅惠三州自是英肇欽  
連諸郡皆附且治兵由梅嶺將赴江西而元佑有異志  
遮道固留陰令其子榮率外賊突入奪符信殺官吏變  
起倉卒衆莫能支托里布哈為槍所中子達蘭布哈率  
麾下力與抗死之托里布哈被執擁至太平橋罵不絕

口為賊所殺其妻布延氏妾高麗氏在側不去皆大罵  
曰我平章遇爾父子厚爾何暴逆至此亦皆遇害其部  
將哈奇爾吳布延阿拉克布哈迪延右哈等俱戰死

劉濬字濟川其先興州人曾祖海金進士第一仕至河  
南府尹死國難子孫遂家河南濬由廉訪司書吏授連  
江縣寧善鄉巡檢至正十三年蘄州賊帥王善冠闖官  
軍守羅源縣拒之羅源與連江接壤勢將迫濬妻真定  
史氏故相家女也有才識謂濬曰事急矣可聚兵以捍

一方於是盡出奩中物募壯士百餘人命仲子健將之  
浹旬間衆至數萬賊尋破羅源分道攻福州濬拒之辰  
山三戰三捷俄聞福州陷衆多潰去濬獨帥健兵進遇  
賊于中麻突其陣斬前鋒五人賊大至濬中箭墮馬健  
下馬掖之俱被獲濬忿戰手大罵賊縛之階下先斫一  
指罵益厲再斫一指亦如之指且盡斫兩腕次及兩足  
濬色不少變遂割其喉舌而死健亦以死拒賊善義之  
使斂父屍瘞馬健歸請兵於帥府以復父讐弗聽乃散

家資結死士百人詐為工商流丐入賊中夜半發火大  
譟賊驚擾自相屠戮健手斬殺其父者并擒善獻帥府  
磔之事聞授健古田縣尹

伊蘇台永古特部人中書右丞趙世延子也由西行臺  
御史轉黃州路總管湖廣陷朝廷察其材擢四川行省  
叅政命與平章耀珠同討賊耀珠軍五千人乃分銳卒  
八百使將之為前驅攻克巴東時歸峽等州皆為賊守  
伊蘇台破賊江上斬溺無算已而歸峽平進拔枝江松



滋兩縣乘勝趨江陵賊出陣清水門鏖戰至夕賊方退  
乃據其門埃耀珠軍至黎明賊出戰三時頃耀珠軍止  
百步外不救賊飛槍刺之死事聞追封涼國公諡忠壯  
陳君用字子材延平人少負氣勇猛過人紅巾賊入閩  
閩閩授君用南平縣尹給錢五萬緡俾募兵君用散家  
財繼之導官軍復建陽浦城等縣以功授同知建寧路  
事亡何賊圍福州君用率兵往援大敗賊衆遂引兵踰  
北嶺至連江阻水而陣君用曰今日不盡殺賊吾不復

生還矣乃率壯士六十人徒步斬殺賊稍潰既而復合  
君用大呼陷陣中槍死事聞追封潁川郡侯諡忠毅  
布琳尼敦北庭人官山南道廉訪使治中興每按臨所  
部威惠翕然至正十二年斡賊犯中興布琳尼敦以兵  
與抗射賊多死賊稍却明日復擁衆襲東門力戰被執  
不屈死又明日賊且奄至前中興判官上都統兵出擊  
之既而東門失守倉皇反鬪力屈亦被執誘使降上都  
大罵賊剝其腹剖其肉而死

綽哈扎拉台氏由國子生為靖安縣達嚕噶齊至正十二年蘄黃賊起與縣尹黃紹同集義兵為守禦計未幾賊兵數萬由武寧來攻紹赴行省求援道梗不得達綽哈獨率衆與賊戰于象湖大破之乃起進士胡斗元等共謀畫而以勇士黃雲為前鋒自二月至于八月戰屢捷賊黨益盛雲戰死綽哈被圍尋為賊所執殺于富州子民安圖襲父職屢率衆敗賊復縣治踰年賊兵復至迎戰力竭賊執而削之紹字仲先臨川人至正八年進

士以求援出遇官軍護之入龍興時龍興亦被圍及圍解乃還與民安圖招諭叛境過建昌之高坪遇賊紹與戰不勝正衣冠怒罵遂為所害斗元字元浩靖安人至正十年領鄉薦第一署鰲溪書院山長賊至斗元以鄉兵擊敗之入縣治與綽哈共圖戰守及綽哈被執賊脅之使降斗元罵不屈乃以土埋其腰不死又縛置暗室中斗元仆牆以出逃入深山狂病而卒黃雲撫州人寓靖安素勇敢每接戰獨以身當敵嘗為數十人所圍能

奮身躍出至是身中數十槍噴血罵賊而死

魏中立字伯時濟南人由國子伴讀歷官陝西行臺御史中丞遷守饒州紅巾賊倪文俊既陷湖廣分攻州郡所在無賴子多乘間竊發不旬日衆輒數萬皆短衣草屨齒木為杷削竹為槍截緋帛為巾襦彌野皆赤中立聞警即率丁壯分塞險要賊至以義兵擊卻之已而賊復合遂為所執以紅衣披其身中立叱之須髯盡張賊執歸斲水欲屈其從已中立大罵不已遂見殺賊自饒

趨信州總管于大本以土兵禦之賊破東門入執大本  
至蘄水為俘獻文俊釋其縛畀偽印一紐大本投印于  
地罵賊遇害大本字德中密州人

欽定續通志卷五百二十一

欽定四庫全書

欽定續通志卷五百二十二

忠義傳

元三

董搏霄

昂霄

王英

福壽

伯嘉努  
連年達薩

賀方

鄭玉

黃昇

拜特穆爾

德呼默色

和爾多卜丹  
呂復

布延布哈

申榮



閔本拜珠

趙弘毅恭

王遜志

保賽音布哈張庸  
段禎

丁好禮郭庸

陳友定海尹克仁多爾瑪王翰巴延子中  
武定定張文貴吳訥楊惠僧住馬浩伊納

克實章僧格實哩王可阿實克布哈朱春鄧祖勝  
布延特穆爾張翔趙元隆陳瑜劉永錫特穆爾布

哈元圖們董丑  
趙世傑楊椿

巴匝爾幹爾密托迪  
律爾

董博霄字孟起磁州人由國子生辟陝西行臺掾歷遷

浙東宣慰副使所至皆有聲至正十一年除濟寧路總管從江浙平章嘉瑄討徐壽輝進兵安豐屢敗賊衆復其城十二年命移軍援江南至湖州之德清時徐壽輝將項普畧引兵自徽饒陷杭州嘉瑄問計搏霄曰賊見杭州城子女玉帛必縱慾不暇為備宜急攻之若退保湖州倘賊乘銳直趨京口則江南不可為矣嘉瑄猶豫未決諸將亦難其行搏霄正色曰江浙相君方面既陷於賊今可取而不取誰任其咎復拔劍顧諸將曰諸君荷

國厚恩而臨難苟免今相君在是敢有慢令者斬遂進  
兵薄杭城賊迎敵至鹽橋搏霄麾壯士突前諸軍相繼  
夾擊之凡七戰追殺至清河坊賊奔接待寺塞其門而  
焚之賊皆死遂復杭州已而餘杭武康德清次第平搏  
霄亦受代去徽饒賊復自昱嶺關寇於潛行省乃假搏  
霄為參知政事俾提兵討之即日引兵至臨安新溪分  
守各隘兵至叫口及虎檻遇賊皆大破之復於潛既又  
克復昌化縣及昱嶺關降賊將潘大翰等二千人賊攻

獨松百丈幽嶺三關搏霄先以兵守多溪多溪三關要  
路也既又分軍為三各出一關會擣賊巢遂乘勝復安  
吉賊復來窺獨松搏霄更以兵守苦嶺及黃沙嶺賊帥  
多來降復進兵廣德克之斬饒諸賊犯徽州有道士能  
作十二里霧搏霄以兵擊之已而妖霧開豁諸伏兵皆  
起襲賊兵後賊大潰亂斬首數萬級擒千餘人獲道士  
焚其妖書斬之遂平徽州

按輟耕錄云搏霄號今嚴肅  
凡克復諸郡不殺傷不抄掠

四方之士歸之禮遇勤至尊酒在前起  
立捧觴取其所長而任之得待士之體

十四年遷樞密

院判官從丞相托克托征高郵分戍鹽城興化賊巢在大縱德勝兩湖間凡十有二志勦平之即其地築芙蓉砦賊入輒迷故道自是不復敢犯賊恃習水渡淮北據安東州搏霄招善水者五百人與戰于安東之大湖大敗之遂復安東十六年勦平北沙廟灣沙浦等砦尋進兵泗州不利賊乘勝東下斷糧道乃回軍屯北沙糧且絕與賊死戰七晝夜賊敗走奪船七十餘始得渡淮保泗州時方暑雨湖水溢諸營皆避去搏霄獨守孤城賊

環繞數十里攻之搏霄坐城上遣偏將以騎士由西門  
突出賊後約曰旗一麾即還既而旗動騎士還步卒自  
城中出夾擊之賊大衄乃結陣西行轉戰數十合始至  
海寧升同簽淮南行樞密院事搏霄建議于朝曰淮安  
為南北襟喉其地一失兩淮皆未易保為今日計莫若  
於黃河上下并瀕淮海之地及南自沐陽北抵沂莒贛  
榆諸州縣布連珠營每三十里設一總砦就三十里中  
又設一小砦使斤堠烽燧相望而巡邏往來遇賊則并

力野戰無事則屯種而食然後進有援退有守又海寧一境不通舟楫軍糧惟可陸運而九瀕淮海之地人民屢經盜賊宜加存撫權令軍人搬運其陸運之方每人行十步三十六人可行一里三千六百人可行百里每人負米四斗以夾布囊盛之用印封識人不息肩米不著地排列成行日行五百回計路二十八里輕行一十四里重行一十四里日可運米二百石每運給米一升可供二萬人此百里一日運糧之術也又江淮南北之

民壯者既為軍老弱無所依歸者宜置軍民防禦司擇  
軍官材堪牧守者居之而籍其民以屯故地於以練兵  
積穀且耕且戰內全山東完固之邦外禦淮海出沒之  
寇而後恢復可圖也十七年妖寇劉福道遣偽將毛貴  
陷益都般陽等路有旨命搏霄從知樞密院事布呼齊  
討之而濟南適告急搏霄乃提兵援濟南賊衆自南山  
來攻望之兩山皆赤搏霄按兵城中先以數十騎挑之  
賊衆悉來鬪騎兵少卻至礮上伏兵起遂合戰城中兵



亦出大破之般陽賊復約泰安之黨踰南山來襲濟南  
搏霄列兵城上弗為動賊夜攻南門以矢石禦之黎明  
乃默開東門放兵出賊後既旦城上兵皆下大開南門  
合擊之賊敗走濟南始寧改淮南行樞密院副使兼山  
東宣慰使都元帥有疾其功者譖於總兵太尉努都爾  
噶令搏霄依前詔從布呼齊征益都搏霄即出濟南城  
屬老且病請以弟昂霄代領其衆朝廷從之授昂霄淮  
南行樞密院判官未幾命搏霄守河間之長蘆十八年

搏霄以兵北行且曰我去濟南必不可保既而果陷搏  
霄方駐兵南皮適有旨擢河南右丞甫拜命毛貴兵至  
營壘猶未完諸將請曰賊至當如何搏霄曰我受命至  
此當以死報國耳因拔劍督戰賊衆突至捽搏霄刺殺  
之是日昂霄亦戰死事聞封魏國公謚忠定昂霄隴西  
郡侯謚忠毅搏霄早以儒生起家輒為能吏會天下大  
亂乃復以武功自奮其才畧有大過人者用不能盡其

才君子惜之

按董搏霄王英福壽三人皆忠節  
著元史舊係列傳今並移入忠義

王英字邦傑益都人性剛果有大節膂力絕人襲父職為莒州翼千戶父子皆善用雙刀號刀王至元二十九年江西行院命往南雄討賊丘太老等殺其渠帥元貞初從左丞董士選討大山賊劉貴擒之二年討永新安福二州賊餘黨皆息延祐二年寧都賊起行省命英討之屢戰皆勝斬獲不可勝數行省平章李世安遣英逐江浙平章張閻所領軍於閩境至木麻坑擒賊蔡五九又追賊至上虎嶂遇賊三千餘人盡殲之歷官同知海北海

南道宣慰司事順帝至元三年漳州李志甫潮州劉虎  
仔並起為亂時英已致仕平章巴咱爾謂僚佐曰是非  
刀王不可其人雖投老可以義激遣使迎致之英曰國  
家有事吾雖老其可坐視乎據鞍橫槊精神飛動馳赴  
馬及賊平英功居多至正中毛貴陷益都英時年九十  
六謂其子宏曰我世受國恩美官厚祿備嘗享之今老  
矣縱不能事戎馬以報天子尚忍食異姓之粟以求生  
乎水漿不入口者數日遂卒毛貴聞之使具棺衾以葬

將斂舉其尸不動焚香祝曰公子宏請公歸葬先塋祝  
畢尸遂起山東宣慰使布延布哈及憲司請恤典于朝  
有曰不食寇粟餓死芹泉有夷齊之風為臣之清者也  
芹泉谷名英所居也

福壽唐古人幼俊茂知讀書尤善應對既長入備環衛  
用年勞授長寧寺少卿改引進使累遷為同知樞密院  
事至正十一年潁州以賊反告時車駕在上都朝臣欲  
驛奏以待命福壽獨決議調兵討之而後以聞順帝善

其處事得宜明年改伊克扎爾古齊未幾出為淮南行  
省平章政事時濠泗俱陷師久無功福壽至督戰甚急  
而上游賊勢甚洶湧乃築石頭斷江南衆恃以為固十  
五年遷江南行臺御史大夫先是集慶嘗有警鄂爾和  
以湖廣平章政事將苗軍來援駐軍揚州俄而苗軍殺  
鄂爾和以叛集慶之援遂絕及高郵廬和等州相繼淪  
陷集慶勢益孤福壽因下令勸富民出貲以助糧餉激  
厲士衆為完守計朝廷知其勞數賞賚焉十六年明兵

圍集慶福壽數督兵出戰已而勢不能支城遂破百司皆奔潰福壽獨據牀坐鳳凰臺下或勸之去叱曰吾為國家重臣城破則死尚安往俄亂兵四集遂遇害同時死者參政伯嘉努

據明史陳友定傳補入

治書侍御史賀方達嚕

噶齊達年達薩事聞追封福壽衛國公謚忠肅

鄭玉字子美徽州歙縣人幼敏悟嗜學既長覃思六經尤邃於春秋絕意仕進門人受業者衆所居至不能容相與即其地構師山書院處焉至正十四年除翰林待

制朝廷遣使以御酒名幣浮海徵之玉辭曰名爵者祖宗所遺使與天下賢者共之待制之職臣非其才不敢受酒與幣臣不敢辭也家居日以著書為樂十七年明兵入徽州守將將要致之玉曰吾豈事二姓者耶被拘久之親朋每攜具至從容盡歡且告以必死狀妻程氏聞之使語曰君苟死吾其相從地下矣玉使謂曰若果

從吾復何憾明日具衣冠北向再拜自縊死

按新安志云歛人鄭

千齡妻洪氏年二十六而寡始終貞白子二長曰玉次曰璿玉死節妻程亦死之妾何矢志撫其孤璿早卒妻



王亦不二志至  
今稱鄭門四節

黃昇字殷士撫州金谿人博學明經善屬文尤長於詩  
至正十七年丞相太平薦授淮南行省照磨歷官國子  
監丞改翰林待制兼國史院編修官二十八年京城既  
破昇歎曰我以儒致身累蒙國恩為胄子師代言禁林  
今縱不我戮何面目見天下士乎遂赴井死

拜特穆爾字君壽蒙古人至正中累遷福建行省郎中  
治福州以廉能著聲二十七年明舟師由海道趣閩奄

至城下拜特穆爾知城不可守引妻妾坐樓上慷慨謂  
曰丈夫死國婦人死夫義也今城且陷吾必死於是若  
等能吾從乎皆泣曰無他志縊而死者六人有十歲女  
度其不能自死因給之曰汝稽顙拜佛庶保我無恙甫  
拜即挈米囊壓死之乳媪抱其幼子旁立以泣拜特穆  
爾熟視之歎曰父死國母死夫妻與女從父者也皆當  
死汝三歲兒於義何所從乎為宗祀計可耳乃命媪抱  
匿旁近民舍而斂金珠畀之曰脫有急可以此贖兒命

有頃兵入城即舉燈燃四圍窻火大發遂自焚死

德呼默色字子初回回人性剛介事母至孝年四十猶不仕或問之曰吾不忍舍母去以宿衛年勞授行宣政院崇教三遷為漳州路達嚕噶齊明兵既取福州興化泉州相繼納款德呼默色仰天歎曰吾不材位三品國恩厚矣報國者惟有死耳亡何吏走白招諭使者至請出城迓之答曰爾第往吾行出矣乃詣廳事具公服北面再拜畢引斧斫其印大書手版曰大元臣子即入位

拔所佩刀割喉既死猶手執刀按膝坐儼然如生郡民  
斂其屍葬東門外時有和爾多卜丹者亦回回人官廣  
東廉訪簽事有呂復者為江西行省都事皆寓福州而  
復以行省命攝長樂縣事福州既下和爾多卜丹曰吾  
兄弟三人皆忝進士受國恩四十年今雖無官守然大  
節所在其可辱乎以石自繫其腰投井死復亦曰吾世  
食君祿今雖攝官若不以死報國則無以見先人於地  
下乃引繩自經和爾多卜丹兄曰穆壘丹者官建康曰

該里丹者官信州先是亦皆死國難云

布延布哈字希古蒙古人個儻有大志由國子生登至  
正五年右榜進士第一授翰林修撰遷江西行省郎中  
徐壽輝寇江西布延布哈戰守之功為多語在道通傳  
累轉中書參知政事十八年詔與治書侍御史李國鳳  
同經畧江南至建寧陳友諒遣賊鄧克明來寇時國鳳  
分鎮延平城陷遁去布延布哈曰我承制來此去將何  
之誓與此城同存亡耳前後拒戰六十四日既而大敗

賊衆明年召還授山東宣慰使再轉知樞密院事平章  
山東行省守禦益都明兵壓境捍城力戰城陷布延布  
哈還告其母曰兒忠孝不能兩全有二弟當為終養拜  
母趨官舍坐堂上主帥素聞其賢召之再三不往既而  
面縛之布延布哈曰我元朝進士官至極品臣各為其  
主何以生為竟不屈死先是其妻阿爾展呼家人告曰  
我受國恩封齊國夫人今事至此唯有死耳已而布延  
布哈二弟之妻各抱幼子及婢妾溺舍南井死比阿爾

展欲下井填塞不可容遂抱子投舍北井其女及妾女  
孫女皆隨溺焉是時有申榮者官山東行省平章守東  
昌見列郡皆降告其父曰人生世間不能全忠孝者兒  
也城中兵少不敵戰則萬人之命由兒而廢但有一死  
報國耳遂自經

閔本字宗先河內人性剛正早歲刻志於學推擇為禮  
部令史由御史臺掾五轉為吏部尚書移刑戶二部皆  
以能見稱本素有目嘗上章乞謝事不允詔授集賢

侍講學士明兵薄京誠本謂其妻程氏曰國事至此吾知之久矣愧不能立功補報敢愛六尺軀苟活哉程曰君能死忠妾豈貪生獨不能以身相殉乎本乃朝服與程氏北向再拜大書其官職姓名于屋壁遂各縊焉二女長真真次女女亦號泣自縊於其側有拜珠者字聞善喀喇人也由國學生以材累官翰林國史院都事為太子司經明兵至拜珠謂家人曰吾始祖哈里巴封河東郡公者與太祖同事克呼部汗太祖滅克呼吾祖不



忍改所事避於遠地以沒今吾讀書國學可不知大義

乎况吾累世受國厚恩今國破安忍見之遂赴井死

按粵

志載有高要千戶亦名拜珠嶺南寇至挺身出戰為亂槍所攢瞋目而死史傳未載

趙弘毅字仁卿真定晉州人少好學家貧無書傭於巨室晝則為役夜則借書讀之始辟為翰林書寫再轉為國史院編修官調大樂署令明兵入京城弘毅歎曰忠臣不二君烈女不二夫古語也我今力不能救社稷但有一死報國耳乃與妻解氏皆自縊其子恭為中書管

勾與妻子訣曰今乘輿北奔我父子世食祿不能効尺  
寸况吾父母已死尚何敢愛死乎或止之曰我曹官卑  
何自苦如此恭叱曰爾非吾徒也古者忠義各盡自心  
豈問職之崇卑乎遂北向再拜縊死其女官奴年十七  
見恭死方大泣適隣媪數輩來相率出避曰我未適人  
避將何之潛入中堂解衣帶自經

王遜志字文敏憚之曾孫也以廕授侍儀司通事舍人  
歷簽漢中河西山北三道廉訪司事入拜監察御史劾

詹事布呼齊平章伊敦皆逆臣子孫當屏諸遐裔出為  
江西廉訪副史召簽太常禮儀院事京城不守公卿爭  
出降遜志獨家居衣冠而坐其友中政院判官王翼來

告曰

元一統志  
作王習

新朝寬大盍出詣官自言狀遜志斥之

曰君既自不忠又誘人為不義耶因戒其子曰汝謹繼

吾宗即自投井中死

按王遜志從容就義不虧臣節  
元史舊係列傳今移入忠義

保賽音布哈字德中索隆噶台人有膂力善騎射由舒  
庫爾齊授利器庫提點累遷翰林學士承旨兼巡軍合

浦全羅等處軍民萬戶都元帥除大司農出為嶺北行  
省右丞升平章政事至正中皇太子撫軍冀寧承制拜  
中書平章明兵逼京師詔守順承門所領兵僅數百羸  
卒歎息謂左右曰國事至此吾但知與此門同存亡耳  
城陷被執不屈死是時有張庸者字存中温州人精太  
乙數遭世亂以策干經略使李國鳳承制授福建行省  
員外郎治兵杉關頃之計事赴京師進太乙數圖歷官  
刑部尚書領團練守駱駝谷會諸寨皆降遣從事段禎

求援於庫庫特穆爾不報寨民李世傑執庸出見主將  
庸不屈與禎同被殺

丁好禮字敬可真定蠡州人精律算初試吏於戶部辟  
中書掾授戶部主事擢江南行臺御史復入戶部累遷  
至侍郎除京畿漕運使建議置司於通州講究漕運利  
病著為成法人皆便之至正二十年拜中書參知政事  
時京師大饑天壽節廟堂欲用故事大饗會好禮言今  
民父子有相食者君臣當修省以弭大患饗會宜減常

度不聽乞謝事乃以集賢大學士致仕給全俸家居二十七年復起為中書平章政事尋以論議不合謝政去特封趙國公明兵入京城或勸其往謁主帥好禮叱曰我以小吏致位極品爵上公今老矣恨無以報國所欠惟一死耳後數日主帥來召不肯行昇至齊化門抗辭不屈死是日中書參知政事郭庸亦昇至齊化門衆叱之拜庸曰臣各為其主死自吾分何拜之有亦不屈死庸字允中蒙古人由國學生釋褐累遷陝西行臺御史

嘗與同列劾知樞密院事額森特穆爾喪師左遷中興  
總管府判官其後額森特穆爾以罪黜召拜監察御史  
轉叅政中書其節義與好禮並云

陳友定一名有定字安國福清人徙居汀之清流世業  
農為人沈勇喜遊俠鄉里皆畏服至正中汀州府判蔡  
公安至清流募民兵討賊友定應募公安與語竒之使  
掌所募兵署為黃土砦巡檢以討平諸山寨功遷知清  
流縣令陳友諒遣其將鄧克明等陷汀邵畧杉關行省

授友定汀州路總管禦之戰於黃土砦大捷走克明踰  
年克明復取汀州急攻建寧守將鄂勒哲特穆爾檄友  
定入援連破賊悉復所失郡縣行省上其功第一進參  
知政事已置分省於延平以友定為平章於是友定盡  
有福建八郡之地友定以農家子起傭伍目不知書及  
據八郡數招致文學知名士留置幕下麤涉文史然頗  
任威福所屬違令者輒承制誅竄不絕於是威震八閩  
然事元未嘗失臣節歲輸粟數十萬石海道遼遠至者



常十三四順帝嘉之下詔褒美明太祖既平方國珍即發兵伐之將軍何文輝胡廷美由江西趨杉關湯和廖永忠由明州海道取福州李文忠由浦城取建寧而別遣使至延平招諭友定友定置酒大會諸將及賓客殺明使者瀝其血酒甕中與衆酌飲之酒酣誓於衆曰吾曹並受元厚恩有不以死拒者身磔妻子戮遂往視福州環城作壘距壘五十步輒築一臺嚴兵為拒守計已而聞杉關破急分軍為二以一軍守福而自帥一軍守延

平以相犄角及湯和舟師抵福之五虎門平章庫春引  
兵逆戰敗明兵緣南臺蟻附登城守將遁去參政尹克  
仁宣政使多爾瑪不屈死僉院拜特穆爾積薪樓下舉  
家自焚死廷美克建寧湯和進攻延平友定欲以持久  
困之諸將請出戰不許數請不已友定疑所部將叛殺  
蕭院判軍士多出降者會軍器局災城中礮聲震地明  
師知有變急攻城友定呼其屬訣曰大事已去吾一死  
報國諸君努力因退入省堂衣冠北面再拜仰藥死所

部爭開城門納明師師入趨視之猶未絕也昇出水東門適天大雷雨復甦械送京師明帝詰之友定厲聲曰國破家亡死耳尚何言遂併其子海殺之海一名宗海工騎射亦喜禮文士友定既被執自將樂歸於軍門至是從死元末所在盜起民間起義兵保障鄉里稱元帥者不可勝數朝廷輒因而官之其後或去為盜或事元不終惟友定父子稱完節焉友定既死興化泉州皆望風納款獨漳州路達嚕噶齊德呼默色刺暖而死時云

閩有三忠謂友定拜特穆爾德呼默色也

按陳友定巴  
匝爾幹爾密

二傳元史不載今因其皆為元守土死節且附  
見多人從明史列傳採入次于元忠義之末云有王翰

者字用文仕元為潮州路總管友定敗為黃冠棲永泰  
山中者十載太祖聞其賢強起之自刎死有子偁知名  
為友定所辟者又有巴延子中其先西域人後任江西  
因家焉明春秋行省辟授建昌教授慷慨喜談兵江西  
盜起授分省都事使守贛州而陳友諒兵已破贛子中  
倉卒募民與鬪城下不勝脫身間道入閩陳友定素知

之辟授行省員外郎出奇計以友定復建昌浮海如元  
都獻捷累遷吏部侍郎持節發廣東何真兵救閩至則  
真已降於廖永中子中跳墮馬折一足致軍前永中欲  
脅降之不屈永中義而舍之乃變姓名冠黃冠遊行江  
湖間明太祖求之不得簿錄其妻子子中竟不出常齋  
鷓自隨久之事寢解乃還鄉里洪武十二年詔郡縣舉  
元遺民布政使沈立中密言子中於朝以幣聘使者至  
子中太息曰死晚矣為歌七章哭其祖父師友飲鷓死

當元亡時守土臣伏節死者甚衆明兵克太平總管靳  
義赴水死克鎮江守將段武平章定定戰死克寧國百  
戶張文貴殺妻妾自刎死克徽州萬戶吳訥戰敗自殺  
克婺州浙東廉訪使楊惠婺州達嚕噶齊僧住戰死克  
衢州總管馬浩赴水死克大都真定路達嚕噶齊伊納  
克實章聞難朝服登城西陴北面再拜投陴死克奉元  
西臺御史僧格實哩與妻子俱投陴死郎中王可仰藥  
死檢校阿實克布哈自經死三原縣令朱春與其妻投

繆死攻永州右丞鄧祖勝固守食盡力窮仰藥死克梧  
州吏部尚書布延特穆爾戰死張翹赴水死克靖江都  
事趙元隆陳瑜劉永錫廉訪使簽事特穆爾布哈元帥  
元圖們萬戶董丑漢府判趙世傑皆自殺又張士誠破  
平江時參軍楊椿挺身戰刃交於胸瞋目怒罵死妻亦  
自經

巴匝爾幹爾密元世祖第五子雲南王和克齊之裔也  
封梁王仍鎮雲南順帝之世天下多故雲南僻遠王撫

治有威惠至正二十九年明玉珍僭號於蜀遣兵三道  
來攻王走保金馬山明年以大理兵迎戰玉珍兵敗退  
久之順帝北去大都不守中國無元尺寸地而王守雲  
南自若歲遣使自塞外達行在執臣節如故未幾明師  
平四川天下大定明太祖以雲南險僻不欲用兵明年  
北平守將以所得王遣往漠北使者蘇成來獻明太祖  
乃命待制王禕齎詔偕成往招諭王待禕以禮會元嗣  
君遣使托克托來徵餉托克托疑王有他意因脅以危



語王遂殺禕而以禮斂之踰三年明太祖復遣湖廣參政吳雲偕所獲雲南使臣鐵知院等往知院以己奉使被執誘雲改制書給王雲不從被殺王聞雲死收其骨送蜀給孤寺明太祖知王終不可諭降乃命傅友德為征南將軍藍玉沐英為副帥師征之洪武十四年十二月下普定王遣司徒平章達爾瑪率兵駐曲靖沐英引軍疾趨乘霧抵白石江霧解達爾瑪望見大驚友德等率兵進擊達爾瑪兵潰被擒先是王以女妻大理酋段

得功嘗倚其兵力後以疑殺之遂失大理援至是連爾  
瑪敗失精甲十餘萬王知事不可為走普寧州之忽納  
若焚其龍衣驅妻子赴滇池死遂與左丞托迪右丞律  
爾夜入草舍俱自經明太祖遷其家屬於耽羅



欽定續通志卷五百二十二

欽定四庫全書

史部

欽定續通志卷五百二十六

三至六

侍講學士臣羅國俊覆勘

總校官原任侍講臣王燕緒

欽定四庫全書

欽定續通志卷五百二十三

孝友傳

臣等謹案孝友立傳始自晉書宋齊周隋曰孝義  
梁陳曰孝行後魏曰孝感通志統名孝友考唐以  
後五代史曰一行宋史曰孝義今依通志之例統  
曰孝友遼史舊無此傳亦仍其闕焉

唐

李知本 知隱

張志寬

劉君良

宋興貴

張公藝

杜楚客

王少玄

任敬臣

支叔才

王遇  
王退

程素師

武弘度

宋思禮

鄭潛曜

元讓

裴敬彝

梁文貞

沈季詮

許伯會

陳集原

陸南金 趙璧

張琇 理  
王君操  
趙師舉

同蹄智壽 智爽 徐元慶  
余安常 梁悅 康買得

侯知道

程俱羅李興

何澄耕

許法慎

崔衍

林攢

丁公著

陳饒奴

王博武

萬敬儒

章全益

張士巖

焦懷肅

張進昭

李知本趙州元氏人元魏洛州刺史靈六世孫父孝端

隋獲嘉丞與族弟太沖俱有世閥而太沖官婚最高孝

端方之為劣

據舊書增

鄉人語曰太沖無兄孝端無弟知本

涉經術事親篤至與弟知隱雍順子孫百餘至賞用僮僕無間也大業末盜賊過問不入相戒曰無犯義門往依者五百餘室皆賴以免貞觀初知本為夏津令知隱伊闕丞開元中知本孫為瑱給事中揚州長史知隱孫顯有文辭至太常少卿從祖兄弟位給事者凡四人

張志寬蒲州安邑人居父喪哀毀州里稱之王君廓兵略地不暴其間倚以全者百許姓後為里正忽詣縣稱母疾求歸令問狀對曰母有疾志寬輒病是以知之令



謂其妄繫于獄馳驗如言乃憫遣之母終負土成墳手  
蒔松柏高祖遣使者就弔拜員外散騎常侍賜帛四十  
段表其閭

劉君良瀛州饒陽人四世同居斗粟尺帛無所私隋大  
業末荒饑妻欲勸其異居因易置庭樹烏雛令鬪且鳴  
家人怪之妻曰天下亂禽鳥不相容况人耶君良即與  
兄弟別處月餘密知其計因斥去妻曰爾破吾家召兄  
弟流涕以告更復同居天下亂鄉人共依之衆築為堡

因號義成堡武德中深州別駕楊弘業至其居凡六院  
共一庖子弟皆有禮節歎悒而去貞觀六年表異門閭  
宋興貴雍州萬年人累世同居躬耕致養至興貴已四  
從矣武德三年詔表其門閭蠲免課役

張公藝鄆州壽張人九代同居貞觀中敕加旌表高宗  
有事泰山親幸其宅問其義由請紙筆但書百餘忍字  
帝為之流涕賜以纁帛

案宋興貴張公藝舊書均附劉  
君良傳後新書無傳今據補入

杜楚客僕射如晦從弟少尚氣節與叔父淹皆陷于王

世充淹與如晦有隙譖其親兄殺之并囚楚客瀕死世  
充平淹當誅楚客請于如晦不許楚客曰叔殘兄今兄  
又棄叔門內幾盡豈不痛哉如晦感悟請之高祖得釋  
方建成難作楚客遁舍嵩山貞觀四年召為給事中累  
遷蒲州刺史政有能名徙瀛州後為魏王府長史遷工  
部尚書攝府事及王貶爵以如晦功免死廢于家終度

化令

案杜楚客新舊書俱附見  
杜如晦傳後今改入孝友

王少玄博州聊城人父隋末死亂兵遺腹生少玄甫十

金史卷一百一十一  
卷五十一  
歲問父所在母以告即哀泣求尸時野中白骨覆壓或  
曰以子血漬而滲者父齒也少玄鏡膚閱旬而獲遂以  
葬創甚彌年乃興貞觀中州言狀拜徐王府參軍

任敬臣字希古棣州人五歲喪母哀毀天至七歲問父  
英曰若何可以報母英曰揚名顯親可也乃刻志從學  
汝南任處權見其文驚曰孔子稱顏回之賢以為弗如  
也吾非古人然見此兒信不可及十六刺史崔樞欲舉  
秀才自以學未廣遜去又三年卒業舉孝廉授著作局

正字父亡數殞絕繼母曰兒不勝喪謂孝可乎敬臣始  
進饘粥服除遷祕書郎休沐闔門誦書監虞世南器其  
人歲終書上考固辭名為弘文館學士俄授越王府西  
閣祭酒當代王再表留進朝請即舉制科擢許王文學  
復為弘文館學士終太子舍人

支叔才定州人隋末荒饑夜丐食野中還進母為賊執  
欲殺之告以情賊憫其孝為解縛母病癰叔才吮瘡注  
藥及亡廬墓有白鵲止墓傍高宗時表異其家至德間

有常州人王遇弟遐俱為賊執將釋一人兄弟相讓死  
賊感其義盡縱之

程袁師宋州人母病十旬不褫帶藥不嘗不進代弟戍  
洛州母終聞訃日走二百里因負土築墳號癯人不復  
識改葬曾門以來閱二十年乃畢常有白狼黃蛇馴墓  
左每哭羣鳥鳴翔永徽中刺史狀諸朝詔吏敦駕既至  
不願仕授儒林郎還之

武弘度士護兄之子補相州司兵參軍永徽中父卒自

徐州被髮徒跣趨喪所負土築塋晨夕號日一溢米素  
芝產廬前狸擾其旁高宗下詔褒美旌其門

宋思禮字過庭事繼母徐以孝聞補蕭縣主簿會大旱  
井池涸母羸疾非泉水不適口思禮憂懼且禱忽有泉  
出諸庭味甘寒日不乏汲縣人異之尉柳冕為刻石誦  
其孝感

鄭潛曜父萬鈞駙馬都尉滎陽郡公母代國長公主開  
元中主寢疾潛曜侍左右造次不去累三月不齷面主

疾侵刺血為書請諸神丐以身代火書而神許二字獨  
不化翌日主愈戒左右無敢言後尚臨晉長公主歷太  
僕光祿卿

元讓雍州武功人擢明經以母病不肯調侍膳不出門  
數十年母終廬墓次廢櫛沐飯菜飲水咸亨中太子監  
國下令表其門問永淳初巡察使表讓孝弟卓越擢太  
子右內率府長史歲滿還鄉里人有所訟皆詣讓判中  
宗在東宮召拜司議郎入謁武后望謂曰卿孝于家必



能忠于國宜以治道輔吾子尋卒

裴敬彝絳州聞喜人曾祖子通隋開皇中以太中大夫居母喪哭喪明有白鳥巢冢樹兄弟八人皆以孝聞詔表其門世謂義門裴氏敬彝七歲能文章性謹敏宗族重之號甘露頂父智周補內黃令為下所訟敬彝年十四詣巡察使唐臨直枉臨奇之試命作賦賦工父罪得釋表敬彝于朝補陳王府典籤一日忽泣涕謂左右曰大人病痛吾輒不安今心悸而痛事叵測乃請急倍道

歸而父已卒羸毀踰禮乾封初累遷監察御史母病醫許仁則者甃不能乘敬彝自肩輿往迎既居喪詔贈縑帛官為作靈輦終服以著作郎兼修國史歷中書舍人太子左庶子武后時為酷吏所陷死嶺南

梁文貞號州閩鄉人少從軍守邊逮還親已亡自傷不得養即穿墻為門晨夕汎埽廬墓左喑默三十年家人有所問畫字以對會官改新道出文貞廬前行旅見之皆為流涕有甘露降瑩木白兔馴擾縣令刊石紀之開

元中刺史許景先表文貞孝絕倫類詔付史官

沈季詮字子平洪州豫章人少孤事母孝未嘗與人爭  
皆以為怯季詮曰吾怯乎為人子者可遺憂于親乎哉  
貞觀中侍母渡江遇暴風母溺死季詮號泣投江中少  
選持母臂浮出水上都督謝叔方具禮祭而葬之

許伯會越州蕭山人舉孝廉上元中為衡陽博士母喪  
負土成墳不御絮帛嘗滋味野火將逮瑩樹悲號于天  
俄而兩火滅歲旱泉湧廬前靈芝生

陳集原隴州開陽人世為酋長父龍樹欽州刺史有疾  
集原輒不食及亡嘔血數升即塋作廬盡以田貲讓兄  
弟里人高之武后時歷右

舊書  
作左

豹韜衛大將軍

陸南金蘇州吳人祖士季從同郡顧野王學左氏春秋  
司馬史班氏漢書仕隋為越王侗記室兼侍讀侗稱制  
擢著作即時王世充將篡逆士季欲因其啓事殺之謀  
洩停侍讀乃不克貞觀初終太學博士兼弘文館學士  
南金仕為太常奉禮郎開元初少卿盧崇道抵罪徙嶺

南逃還東都南金居母喪崇道偽稱弔客入而道其情  
南金匿之俄為讎人跡告詔侍御史王旭捕按南金當  
重法弟趙璧詣旭自言匿崇道者我也請死南金固言  
弟自誣不情旭怪之趙璧曰母未葬妹未歸兄能辦之  
我生無益不如死旭驚上狀帝皆宥之南金知書史履  
操謹完張說陸象先皆賢之由庫部員外以疾改太子  
洗馬卒

張琇河中解人父審素為雋州都督有陳纂仁者誣其

冒戰叔私庸兵玄宗疑之詔監察御史楊汪即按纂仁

復告審素與總管董堂禮

批通鑑作董元禮與此異

謀反於是汪收

審素繫雅州獄馳至雋州按反狀堂禮不勝忿殺纂仁

以兵七百圍汪脅使露章雪審素罪既而吏共斬堂禮

汪得出遂當審素實反斬之沒其家琇與兄瑄尚幼徙

嶺南久之逃還汪更名萬頃瑄時年十三琇少二歲夜

狙萬頃于魏王池瑄斫其馬萬頃驚不及鬪為琇所殺

案舊書云瑄雖年長其發謀及手刃皆琇為之條所以殺萬頃狀繫于斧奔江

南將殺構父罪者然後詣有司道汜水吏捕以聞中書  
令張九齡等皆稱其孝烈宜貸死侍中裴耀卿等陳不  
可帝亦喟然謂九齡曰孝子者義不顧命殺之可成其  
志赦之則虧律凡為子孰不願孝轉相讎殺遂無已時  
卒用耀卿議議者以為寃帝下詔申諭乃殺之臨刑賜  
食理不能進琇色自如曰下見先人復何恨人莫不憫  
之為誅揭于道斂錢為葬北邙尚恐仇人發之作疑冢  
使不知其處太宗時有即墨人王君操父隋末為鄉人

李君則所殺亡命去時君操尚幼至貞觀時朝世更易而君操寔孤仇家無所憚詣州自言君操密挾刃殺之別其心肝噉立盡趨告刺史曰父死凶手歷二十年不克報乃今刷憤願歸死有司州上狀帝為貸死高宗時絳州人趙師舉父為人殺師舉幼母改嫁仇家不疑師舉長為人庸夜讀書久之手殺讎人詣官自陳帝原之永徽初同官人同蹄智壽舊書作周智壽父為族人所害智壽與弟智爽候諸塗擊殺之相率歸有司爭為首有司不



能決者三年或言弟始謀乃論死臨刑曰讐已報死不  
恨智壽自投地委頓身無完膚舐智爽血盡乃已見者  
傷之武后時下邳人徐元慶父爽為縣尉趙師韞所殺  
元慶變姓名為驛家保久之師韞以御史舍亭下元慶  
手殺之自囚詣官后欲赦死左拾遺陳子昂議謂宜正  
國之典寘之以刑然後旌閭墓可也後禮部員外郎柳  
宗元駁曰禮之大本以防亂也若曰無為賊虐凡為子  
者殺無赦刑之大本亦以防亂也若曰無為賊虐凡為

治者殺無赦其本則合其用則異旌與誅不得並也誅其可旌茲謂濫贖刑甚矣旌其可誅茲謂僭壞禮甚矣若師韞獨以私怨奮吏氣虐非辜州牧不知罪刑官不知問上下蒙冒顛號不聞而元慶能處心積慮以衝讎人之胸介然自克即死無憾是守禮而行義也執事者宜有慙色將謝之不暇而又何誅焉其或父不免於罪師韞之誅不愆于法是非死於吏也是死于法也法其可讎乎讎天子之法而戕奉法之吏是悖驚而凌上也

執而誅之所以正邦典而又何旌焉禮之所謂仇者寬抑沈痛而號無告也非謂抵罪觸法陷于大戮而曰彼殺之我乃殺之不議曲直暴寡脅弱而已春秋傳曰父不受誅子復讐可也父受誅子復讐此推刃之道復讐不除害今若取此以斷兩下相殺則合于禮矣且夫不忘讐孝也不愛死義也元慶能不越于禮服孝死義是必達理而聞道者也夫達理聞道之人豈其以王法為讐敵者哉議者反以為戮躄刑壞禮其不可以為典明

矣請下臣議附于今有斷斯獄者不宜以前議從事憲宗時衢州人余常安父叔皆為里人謝全所殺常安八歲已能謀復仇十有七年卒殺全刺史元錫奏輕比刑部尚書李鄴執不可卒抵死又富平人梁悅父為秦果所殺悅殺仇詣縣請罪詔曰在禮父讐不同天而法殺人必死禮法王教大端也二說異焉下尚書省議職方員外郎韓愈曰子復父仇見于春秋與禮記周官若子史不勝數未有非而罪者最宜詳于律而律無條非闕

文也蓋以為不許復仇則傷孝子之心許復仇則人將倚法顛殺無以禁止夫律雖本于聖人然執而行之者有司也經之所明者制有司者也丁寧其義于經而深沒其文于律者將使法吏一斷于法而經術之士得引經以議也周官曰凡殺人而義者令勿仇仇之則死義者宜也明殺人而不得其宜者子得復仇也此百姓之相仇者也公羊子曰父不受誅子復仇可也不受誅者罪不當誅也誅者上施下之辭非百姓相殺也周官曰

凡報仇讐者書于士殺之無罪言將復讐必先言于官則無罪也復讐之名雖同而其事各異或百姓相仇如周官所稱可議于今者或為官吏所誅如公羊所稱不可行于今者周官所稱將復讐先告于士若孤稚羸弱抱微志而伺敵人之便恐不能自言未可以為斷于今也然則殺之與赦不可一宜定其制曰有復父讐者事發具其事下尚書省集議以聞酌處之則經無失指矣有詔以悅申寃請罪詣公門流循州穆宗世京兆人康

買得年十四父憲責錢于雲陽張莅莅醉拉憲危死買  
得以莅趨悍度救不足解則舉錘擊其首三日莅死刑  
部侍郎孫革建言買得救父難不為暴度不解而擊不  
為凶先王制刑必先父子之親春秋原心定罪周書諸  
罰有權買得孝性天至宜賜矜宥有詔減死

侯知道程俱羅者靈州靈武人居親喪穿壙作冢皆身  
執其勞鄉人助者即哭而却之廬墳次哭泣無節知道  
七年俱羅三年不止知道垢塵積首率夜半傳墳踴而

哭鳥獸為悲號李華作二孝贊表其行

案唐文粹載二孝贊序云華奉

使朔陞欲親往平屬河凌絕願言不果憑軾

隔川寄聲二孝同為贊一章以附敦史云

又有何澄

粹者池州人親病日錮俗尚鬼病者不進藥澄粹剔股

肉進親疾為瘳後親沒伏于墓哭踊無數以毀卒當時

號青陽孝子士為作誄甚眾壽州安豐李興父被惡疾

興割股肉以獻父不能啖宿而死興號呼垂血捧土成

墳廬于墓左晝夜哭廬上產紫芝白芝廬中醴泉涌壽

州刺史上其事詔表其廬刻石柳宗元為作孝門銘



許法慎滄州清池人甫三歲已有知時母病不飲乳慘  
慘有憂色或以珍餌詭悅之輒不食還以進母後親喪  
常廬于墓有甘露嘉禾靈芝木連理白兔之祥天寶中  
表異其閭

崔衍字著深州安平人天寶末以明經授富平尉父倫  
使吐蕃被留衍以月俸錢送繼母李氏李不慈倫歸李  
敝衣以見問故曰衍不吾給倫怒召衍將袒而鞭之衍  
涕泣無所陳倫弟殷趨白之倫悟由是諧不得入旋調

清源令勸民力田懷撫流亡觀察使馬燧表其能徙美  
原父卒事李益謹李所生子命多取子母錢衍歲為償  
負不勝計官江州刺史妻子僅免飢寒歷蘇杭二州號  
居陝華間多山田又郵傳劇道而賦數倍入屬歲無秋  
民舉流亡衍亟疏奏之德宗為詔度支減賦遷宣歙池  
觀察使簡靜為百姓所懷卒贈工部尚書衍儉約畏法  
室無妾媵祿稍周于親族葬埋嫁娶倚以濟者數十家  
及卒不能藏喪表諸朝賜賻帛三段米粟稱之元和元

年以衍有惠在民詔書褒美賜一子官謚曰懿

業崔衍  
舊書原

載于孝友新書移  
入列傳今從舊書

林攢泉州莆田人貞元初仕為福唐尉母羸老未及迎而病攢聞棄官還及母亡水漿不入口五日自埏甕作塚廬其右有白鳥來甘露降詔作二闕于母墓前又表其閭蠲徭役時號闕下林家

丁公著字平子蘇州吳人三歲喪母甫七歲見鄰媪抱子哀感不肯食請于父緒願絕粒學老子道父聽之稍

長父勉敕就學舉明經高第授集賢校書郎不滿秩輒去侍養于家父喪負土作塚貌力瘠憊見者憂其死孝觀察使薛苹表上至行詔賜粟帛旌其閭淮南節度使李吉甫表授太子文學兼集賢校理遷直學士充皇太子諸王侍讀穆宗立未聽政召居禁中條詢治理且許以相公著陳讓堅切乃擢給事中遷工部侍郎知吏部選事公著內知帝意嚮用故辭疾求外授浙江觀察使徙河南尹治以清靜聞四遷禮部尚書翰林侍講學士

太和中以病丐還鄉里未至而卒公著清約守道每進一官輒憂見于顏色四十喪妻終身不畜妾及卒天下

惜之

案丁公著舊書原載于孝友新書移入列傳今從舊書

陳饒奴饒州人年十二親并亡寡弱居喪又歲饑或教其分弟妹可全性命饒奴流涕身丐訴相全養刺史李復異之給資儲署其門曰孝友童子

王博武許州人會昌中侍母至廣州及沙涌口暴風母溺死博武自投于水嶺南節度使盧貞俾吏沈畧獲二

屍焉乃葬之表其墓曰孝子墓詔為刻石

萬敬儒廬州人三世同居喪親廬墓刺血寫浮屠書斷  
手二指輒復生州改所居曰成孝鄉廣孝聚大中時表  
其家

章全益梓州涪城人少孤為兄全啓所鞠母病全啓剖  
股膳母而愈及全啓亡全益服斬衰斷手一指以報不  
畜妻僮僕處一室賣藥自業世傳能作黃金居成都四  
十年號章孝子卒

張士巖父病藥須鯉魚冬月冰合有獺銜魚至前得以  
供父父遂愈母病士巖吮血父亡廬墓有虎狼依之  
焦懷肅母病每嘗其唾若味異輒悲號幾絕母終水漿  
不入口五日負土成墳廬守日一食杖然後起繼母沒  
亦如之

張進昭母患狐刺左手墮而終及殯進昭截左腕廬于

墓

案張士巖以下三人見唐書孝友傳序  
不詳里居年月今摘附于本卷之後

五代

臣等謹案歐陽修五代史不立孝友傳今于一行傳中載李自倫一人以符鄭志體例

李自倫

李自倫深州人為本州司功參軍天福四年尚書戶部奏自倫高祖訓訓生粲粲生則則生忠忠生自倫自倫生光厚六世同居敕以所居飛鳧鄉為孝義鄉匡聖里為仁和里旌表門閭使高其外門門安綽楔左右建臺高一丈二尺廣狹方正稱之巧以白而赤其四角使不



孝不義者見之可以悛心而易行焉

欽定續通志卷五百二十三